

## COFNODION CYFARFOD O GYNGOR CYMUNED LLANENGAN a gynhaliwyd nos Fercher, Tachwedd 9fed, 2016 am saith o'r gloch

### PRESENNOL

John Gwilym Jones (Cadeirydd), Thelma Cordingley, John E. Griffiths, Wyn Griffiths, Gwilym Hughes, Robert M. Jones, Dylan Llwyd (cyrhaeddodd 8:10 o'r gloch pan drafodwyd Pwynt x) Materion yn Codi), Catherine Ll. Morris, O. Hefin Roberts, William B. Williams, Cyng. R.H. Wyn Williams (Cyngor Gwynedd) ac aelod o'r cyhoedd

### YMDDIHEURIADAU

Alun Jones (Is-gadeirydd), R. Phillip Roberts, Cyng. John B. Hughes (Cyngor Gwynedd)

### ABSENNOL

Erfyl W. Roberts

Croesawodd y Cadeirydd bawb i'r cyfarfod, gan gynnwys yr aelod o'r cyhoedd.

#### 1. DATGAN BUDDIANT PERSONOL

Datganodd y Cynghorwyr John Gwilym Jones, William B. Williams a Catherine Ll. Morris fuddiant yn 2. Ceisiadau Cynllunio: C16/1272/39/LL – Ymestyn safle carafannau sefydlog er mwyn ail-leoli pedair (4) uned ychwanegol, gan gynyddu'r niferoedd o 32 i 36 – Fferm Tŷ Newydd, Sarn Bach oherwydd bod y ddau gyntaf yn berchnogion meysydd carafannau a'r olaf yn berthynas teuluol.

#### 2. CADARNHAU COFNODION

Cynigiwyd ac eiliwyd bod cofnodion y cyfarfodydd a gynhaliwyd ar Hydref 12fed a 26ain, 2016 yn gywir.

#### 3. CEISIADAU CYNLLUNIO

Trafodwyd y ceisiadau a ganlyn:

C16/1272/39/LL Ymestyn safle carafannau sefydlog er mwyn ail-leoli pedair (4) uned ychwanegol, gan gynyddu'r niferoedd o 32 i 36 – Fferm Tŷ Newydd, Sarn Bach – **Cefnogir**

[Cymerodd Cyng. Robert M. Jones y gadair yn absenoldeb yr Is-gadeirydd a chan y datganodd y Cadeirydd a'r Cyn-gadeirydd ddiddordeb.]

C16/1316/39/LL Codi uchder to'r tŷ fedr (1m) er mwyn medru addasu'r gofod to ac estyniad unllawr cefn – Erwenni, Yr Harbwr, Aber-soch – **Cefnogir**

C16/1336/39/LL	Tŷ newydd dwy lofft a gwaith cysylltiedig – Anhywel, Lôn Pont Morgan, Aber-soch – <b>Gwrthwynebir oherwydd gorddatblygiad ar safle cyfyng ac amlwg, ynghyd â phryder am fynediad i briffordd brysur. Derbyniwyd copi o lythyrau gwrthwynebu cymdogion er gwybodaeth. (Gadawodd yr aelod o'r cyhoedd ar ôl trafod y cais hwn.)</b>
C16/1346/39/LL	Cyfnewid ac ymestyn balconi – 224 Cae Du, Aber-soch – <b>Cefnogir</b>
C16/1375/39/LL	Sied amaethyddol ar gyfer anifeiliaid – Bodwi, Mynytho – <b>Cefnogir</b>

#### 4. MATERION YN CODI

- a) **Toiledau Cyhoeddus Tyddyn Callod, Aber-soch**  
 Derbyniwyd pris o £330.00 + TAW oddi wrth CS Aluminium, sef cost galwad ymweld ac unrhyw ddarn a fyddai ei angen i atgyweirio'r drws. Cafwyd sgwrs â Swyddog Safonau Masnach a ddywedodd nad yw busnes yn dod dan y Ddeddf Defnyddwyr fel ag i gwsmer ond, buasai'n fodlon cynghori unrhyw bryd. Trefnwyd cyfarfod â'r contractwr bore ddoe i drafod y mater ond, adroddodd WBW y datrysodd y broblem – o edrych ar y clo'n iawn, sylwodd fod rhywun wedi gwrthio hanner pric hufen iâ tu ôl i'r clicied ac mai dyna'r rheswm pam nad oedd yn gweithio'n iawn; diolchwyd iddo am ei drafferth. Penderfynwyd cysylltu â chyfreithiwr y Cyngor eto i ofyn am ei gyngor.
- b) **Glanhau Afon Soch**  
 Ni dderbyniwyd cydnabyddiaeth i'r sylwadau a anfonwyd.
- c) **Cheshire Lamont – Gwesty'r Harbwr/Llwybr Estyllog at lan Afon Soch**
- i) **Enw Datblygiad Tai Gwesty'r Harbwr** – E-bost cydnabod derbyn neges a dderbyniwyd oddi wrth y datblygwr parthed yr enw. Deallwyd mai 'Harbour View' a dderbyniodd gweithwyr gosod gwasanaethau fel cyfeiriad yn ddiweddar. Awgrymwyd holi Swyddfa Ddidoli'r Post ym Mhwlheli.
  - ii) **Llwybr Estyllog** – Derbyniwyd pris terfynol y profion oddi wrth Celtest – £1616.00 + TAW a £26.00 y dydd – a fyddai wedi cynyddu'r gwariant heb ddim i'w ddangos amdano dros chwe mil o bunnoedd. Hysbyswyd Datrys na fwriedir parhau â'r cynllun ac ni dderbyniwyd ymateb dim ond cydnabod derbyn y neges.
- ch) **Archwiliad Cyfrifon 2015 – 2016**  
 Cynhaliwyd cyfarfod arbennig i gymeradwyo'r ffurflen ac fe'i derbyniwyd – gweler cofnodion Hydref 26ain.
- d) **Graddfeydd Cyflogau Clercod 2016 – 2018**  
 Gadawodd y Clerc yn ystod y drafodaeth hon. Penderfynodd yr Is-bwyllgor gynnig awr ychwanegol at ei chytundeb presennol, ynghyd â chodi ei chyflog,

yn unol â'r uchod ac fe'i ôl-ddyddir i Ebrill 1af. Trafodir cynllun pensiwn, yn unol â'r rheoliadau newydd mewn cyfarfod arall o'r Is-bwyllgor.

- dd) **Henry Jones (Cricieth) Ltd. – Mynwent y Bwlch**
- Trefnwyd cyfarfod i ddiwygio a diweddarau Rheolau'r Fynwent nos Fawrth, Tachwedd 22ain am saith o'r gloch. Anfonir copi o'r rheolau, gan gynnwys rhai Cyngorau Cymuned Aberdaron a Llanbedrog er gwybodaeth, at aelodau'r Is-bwyllgor (Cadeirydd, Is-gadeirydd, GH, WBW ac EWR) cyn y cyfarfod.
  - Ni dderbyniwyd ymateb oddi wrth yr ymgymerwr/torrwr beddi yn dilyn anfon llythyr ato, ynghyd ag amgáu copïau o'r cwynion a dderbyniwyd. O ganlyniad, nis ymatebwyd i'r cwynwyr.
- e) **Ceisiadau Cynllunio – C16/0629/39/LL – Diddymu Amodau 3 a 4 o Ganiatâd Cynllunio C13/0594/39/LL er mwyn defnyddio uned wyliau bresennol fel tŷ annedd – Taffliad Carreg, Llysfor, Aber-soch**
- Ni dderbyniwyd ateb oddi wrth yr Adran Gynllunio yn dilyn gofyn am eglurhad pam y caniatwyd yr uchod; anfonir llythyr yn hytrach nag e-bost.
- f) **Cyng. Wyn Williams – Cae Chwarae Aber-soch**
- Ni dderbyniodd brisiau na mwy o wybodaeth am osod yr *astro turf* ond, bwriedir mesur y safle gan fesurwr profiadol i'w cael yn hollol gywir. Derbyniwyd llythyr oddi wrth Wicksteed Ltd. yn hysbysu ei bod yn amser cynnal prawf iechyd a diogelwch i'r ddau gae chwarae – fe'i harchebir.
- ff) **Clorian Cymru – Teledu Cylch Cyfyng**
- Cwblhawyd y gwaith yn Nhalafon a gosodir system o'r newydd yn y toiledau fory; derbyniwyd yr anfonebau – gweler 12. Cadarnhau Taliadau a Derbyniadau isod.
- g) **8. Gohebiaeth b) Llywodraeth Cymru – iii) Panel Annibynnol Cymru ar Gydnyddiaeth Ariannol 2017 – 2018 – Adroddiad Blynyddol Drafft**
- Ymgynghoriad – angen sylwadau erbyn Tachwedd 28ain. Mabwysiadwyd Polisi Rheolau Lwfansau i gyd-fynd â'r Adroddiad.

## 5. MATERION CYNLLUNIO

- a) **Mynedfa Newydd Castell, Lôn Pont Morgan, Aber-soch**
- Addawodd y perchennog anfon cais cynllunio tystysgrif cyfreithloni ar gyfer cadw'r fynedfa erbyn mis Rhagfyr.

## 6. MATERION PRIFFYRDD

- a) **Materion Cynnal a Chadw yn y Gymuned**
- i) ***Mainc Sarn Bach*** – gofynnwyd i gontractwr y llwybrau wneud y gwaith, ond heb wneud. Ychwanegwyd bod angen paentio mainc

Bwlchtocyn hefyd – penderfynwyd â phaentwyr lleol i ofyn am amcanbris.

ii) **Coed ger Ysgubor Wen** – mynegwyd pryder am y rhain, gan fod cerddwyr yn gorfod camu allan i'r ffordd mewn man di-balmant peryglus ar y gorau; cysylltir â'r Adran.

b) **Parth 20 m.y.a. ar Lôn Gwydryn, Aber-soch**

Anfonwyd llythyr cefnogi i'r Adran Drafnidiaeth ac ychwanegwyd pe bai Ysgolion Foel Gron a Sarn Bach yn dymuno creu parth y cefnogid hwy hefyd. Cyhoeddwyd enillwyr dylunio'r poster yr wythnos diwethaf a gobeithir y bydd yr arwyddion yn eu lle at y Nadolig.

## 7. MATERION HAWLIAU TRAMWY – LLWYBRAU CYHOEDDUS

Derbyniwyd ateb oddi wrth Dewi Wyn Owen, Uwch Swyddog Hawliau Tramwy, parthed yr isod:

a) **Llwybr 18 – Mynydd Cilan i Garreg Lwyd**

Hysbyswyd y trigolyn lleol, a holodd a fyddai modd ei ailagor, o'r penderfyniad ac atebodd drwy ofyn a fyddai ganddi hawl i'w ddefnyddio o hyd – dywedwyd y câi.

b) **Ffens ger Isfryn, Mynytho**

Mae angen edrych trwy'r hen ffeil llwybrau cyhoeddus.

c) **Torri'r Llwybrau**

Ni chafodd DWO gyfle i ymateb i'r ohebiaeth a anfonwyd ato, gan mai newydd eu hanfon mae'r Clerc.

ch) **Giât Fochyn yn Riffli (Llwybr 12)**

Buasai'n rhaid cael caniatâd y perchennog tir oherwydd y byddai'n welliant ar lwybr – gofyn am gadarnhad o hyn.

d) **Llwybr y Morwyr – Nefyn i Aber-soch**

Cynhelir cyfarfod yn Y Fach am 10.30 o'r gloch bore fory – y Clerc am ei fynychu.

## 8. GOHEBIAETH

a) **Un Llais Cymru (ULIC)**

i) **Ymgynghoriad Adroddiad Blynyddol ULIC**

Copi o'r uchod er gwybodaeth.

ii) **Hyfforddiant Tachwedd a Rhagfyr**

Rhestr o'r sesiynau hyfforddi a gynigir.

iii) **Ysgrifennydd Cabinet yn cynnig datblygiadau cadarnhaol iawn ar gyfer y sector Cynghorau Cymuned a Thref yng Nghymru**

Copi o brif bwyntiau anerchiad Mark Drakeford, AC, Ysgrifennydd Cabinet dros Gyllid a Llywodraeth Leol, yng nghynhadledd blynyddol ULIC.

- iv) ***Comisiwn Seilwaith Cenedlaethol Cymru***  
Ymgynghoriad ar yr uchod a ddaw i ben Ionawr 9fed, 2017.
  - v) ***Gwasanaethau Ymgynghoriaeth 2016***  
Rhestr o'r uchod a ddarperir i aelod gynghorau a ddarperir gan bobl broffesiynol cymwysedig trwy gyfrwng y Saesneg.
  - vi) ***Newyddion Diweddaraf***  
Copi o rifyn cyntaf bwletin newyddion ULIC.
  - vii) ***Holiadur Strydoedd sy'n Gyfeillgar i Oed – Pa mor hawdd yw cerdded yn eich cymdogaeth chi?***  
Copi o'r uchod oddi wrth Heneiddio'n Dda yng Nghymru mewn partneriaeth â Living Streets a'r Ganolfan Ymchwil Heneiddio â Dementia; bodlonodd Cyng. Wyn Williams ei lenwi.
- b) **Llywodraeth Cymru**
- i) ***Ymgynghoriad Diwygio'r Ddeddfwriaeth sy'n ymwneud â'r Dreth Gyngor i adlewyrchu'r premiymau a gyflwynir ar gartrefi gwag tymor hir ac ail gartrefi***  
Angen sylwadau erbyn Rhagfyr 1af.
- c) **Banc Bwyd Pwllheli**  
Cais am lythyr i gefnogi cais y trefnyddion am nawdd ar gyfer gwella ac ailddatblygu ochr orllewinol Eglwys Sant Pedr, Pwllheli, ar gyfer y Banc Bwyd; penderfynwyd ei gefnogi.
- ch) **Clwb Moduro Harlech a'r Cylch – Rali Goffa James Trenholme**  
Llythyr, er gwybodaeth, yn hysbysu y cynhelir yr uchod Tachwedd 12fed – 13eg.
- d) **Swyddfa Comisiynydd Heddlu a Throsedd Gogledd Cymru – Siawns i Ddeud eich Deud am Blismona**  
Ymgynghoriad ar y blaenoriaethau plismona – darparu gwasanaethau plismona ar gyfer Gogledd Cymru i gyd; angen sylwadau erbyn Rhagfyr 16eg.
- dd) **Gwasanaeth Trafnidiaeth – Cynllun Arfaethedig i gyflwyno cyfyngiadau parcio yn ardal Dwyfor, sef Abererch, Aber-soch, Beddgelert, Borth y Gest, Cricieth, Llanbedrog, Morfa Nefyn, Nefyn, Penygwryd, Porthmadog, Pwllheli a Threfor**  
Ystyrir cyflwyno cyfyngiadau parcio ar y ffordd o flaen modurdy T. a G. Williams – llinellau melyn dwbl; ymestyn 'Dim Aros ar Unrhyw Adeg Mehefin 1af – Fedi 15fed' ar Lôn Rhoslyn a llinellau melyn dwbl i lawr ffordd Machros i'r traeth; penderfynwyd derbyn y cyfyngiadau.

- e) **Adran Rheoleiddio – Deddf Cynllunio Gwlad a Thref 1990 – Apêl dan Adran 78(i) – Diddymu Cytundeb 106 Angen Fforddiadwy – Ocean Crossing, Bwlchtocyn**  
Llythyr yn hysbysu y cynhelir yr apêl uchod yng Nghanolfan Frondeg, Pwllheli, ddydd Mercher, Tachwedd 16eg am ddeg o’r gloch.
- f) **Gwasanaeth Trethi – Gwerth Ardrethol Drafft**  
Llythyr yn hysbysu y cwblhaodd Asiantaeth y Swyddfa Brisió yr ymarfer ailbrisiad eiddo busnes yng Nghymru a bod gwerth ardrethol drafft toiledau Lôn Traeth ar gael ar-lein. Ni lwyddwyd cael hyd iddo hyd yma – mae ychydig o broblem â’r union gôd post; gellir apelio cyn Tachwedd 30ain.
- ff) **Cymdeithas Clercod (SLCC) – Arolwg Mynwentydd**  
Arolwg o brinder beddi newydd – ymatebir iddo.
- g) **Asesiad Llesiant Lleol Bwrdd Gwasanaethau Cyhoeddus Gwynedd a Môn – Eich Ardal Chi – Beth sy’n Bwysig?**  
Sefydlwyd Byrddau Gwasanaethau Cyhoeddus ar gyfer pob un o’r 22 ardal awdurdod lleol Cymru ac maent yn gyfrifol am sicrhau bod cyrff cyhoeddus yn gweithio â’i gilydd i greu gwell dyfodol i bobl Cymru, yn unol â Deddf Llesiant Cenedlaethau’r Dyfodol Llywodraeth Cymru a ddaeth i rym ar Ebrill 1af eleni. Diben y ddeddf yw gwella llesiant cymdeithasol, economaidd, amgylcheddol a diwylliannol Cymru. O ganlyniad i sefydlu Bwrdd Gwasanaeth Gwynedd a Môn, a weithia â’i gilydd mewn partneriaeth sy’n cynnwys Cyfoeth Naturiol Cymru, Gwasanaeth Tân ac Achub Gogledd Cymru a Bwrdd Iechyd Prifysgol Betsi Cadwaladr, cynhelir ymgynghoriad cyhoeddus er mwyn i drigolion ddarganfod beth sy’n bwysig i bobl o fewn eu cymunedau a beth hoffent ei wella at y dyfodol. Cynhelir cyfarfod yn Neuadd Aber-soch bnawn Llun, Tachwedd 21ain rhwng dau a phedwar o’r gloch.
- ng) **‘Call hefo’r Geiniog’**  
Hysbyseb digwyddiad, fel rhan o’r gwaith Cynhwysiad Ariannol a wneir drwy’r prosiect Cydymdrechu yn Erbyn Tlodi, a gynhelir ddydd Mercher, Tachwedd 16eg rhwng 10.30 a 1.30 o’r gloch yng Nghapel y Drindod, Pwllheli.

## 9. RHEOLIADAU ARIANNOL/SEFYDLOG, ASESU RISG AC ADOLYGU POLISIÛAU

Dangosodd y Clerc daenlenni ariannol a ‘fenthycodd’ oddi wrth ffrind – fe’i haddasodd ar gyfer y Cyngor, ond mae angen dod i arfer â hwy, yn arbennig yr un cysoni a llif arian. Bydd angen creu cofrestr o asedau’r Cyngor.

## 10. DYFARNIADAU CYNLLUNIO AC YMHOLIADAU CYN CYFLWYNO CAIS

C16/0242/39/LL Estyniadau ochr a blaen, ynghyd â ffenestri gromen a tho – Gwyndy, Cilan – **Caniatawyd ag amodau**

C16/0734/39/TC Defnyddio tir fel safle carafannau teithiol ar gyfer lleoli naw carafán rhwng Mawrth 1af a Hydref 31ain at bwrpas gwyliau –

C16/0735/39/TC	Bryn Bach Camp Site, Bwlchtocyn – <b>Caniatawyd Tystysgrif Cyfreithloni’n unig</b> Defnyddio tir ar gyfer lleoli hyd at 22 pabell ac wyth uned cymysg (pebyll a ‘motor homes’) rhwng Mawrth 1af a Hydref 31ain at bwrpas gwyliau a chadw wyth cysylltiad trydanol – Bryn Bach Camp Site, Bwlchtocyn – <b>Caniatawyd Tystysgrif Cyfreithloni’n unig</b>
C16/0875/39/LL	Dymchwel cwt glan y môr a chodi un newydd yn ei le – Cwt Glan Môr 28, Borth Fawr, Aber-soch – <b>Caniatawyd ag amodau</b>
C16/0931/39/LL	Cais Diwygiedig – Adeiladu pwll nofio awyr agored, ystafell beiriannau i’r pwll nofio, ynghyd â strwythur cegin haf yn cynnwys popty pizza a bbq ag echdynnydd mecanyddol, terasau, tirlunio a ffens derfyn – Blaen y Wawr, Aber-soch – <b>Caniatawyd ag amodau</b>
C16/0980/39/LL	Estyniad unllawr blaen a chefn, codi to brig dros dro fflat cefn, balconi blaen ac addasiadau – Bron Heulog, Aber-soch – <b>Caniatawyd ag amodau</b>
C16/0992/39/CC	Gwaith cynnal a chadw ar goed sy’n destun Gorchymyn Gwarchod Coed – Min y Don, Aber-soch – <b>Caniatawyd ag amodau</b>
C16/0999/39/LL	Dymchwel tŷ annedd ac adeiladau allanol presennol a chodi tri tŷ newydd a gwaith cysylltiedig – Glenville, Aber-soch – <b>Gwrthod</b>
C16/1033/39/LL	Adeiladu sied amaethyddol newydd yn cynnwys storfa slyri integrol – Bodwi, Mynytho – <b>Caniatawyd yn ddi-amodol</b>
C16/1037/39/LL	Adeiladu balconi i’r cefn – 24 Tan y Gaer, Aber-soch – <b>Caniatawyd ag amodau</b>
C16/1080/39/LL	Lolfa wydr unllawr i’r cefn – Dwyfor, Mynytho – <b>Caniatawyd ag amodau</b>
C16/1185/39/LL	Estyniad deulawr ar dalcen dwyreiniol y tŷ, ynghyd â newidiadau – 1 Bryn Llawen, Llanengan – <b>Gwrthod</b>
C16/1195/39/LL	Estyniad llawr cyntaf uwchben y modurdy a phorth gwydr cefn – Bron Gadair, Mynytho – <b>Caniatawyd ag amodau</b>

#### YMHOLIADAU CYN CYFLWYNO CAIS

C16/1045/39/YM	Ymestyn ffenestr fae a balconi llawr cyntaf – Nyth y Frân, Aber-soch
C16/1181/39/YM	Gosod canopi dros ardal fwyta allanol y bwyty – Zinc Café and Bar, Lôn Pen Cei, Aber-soch
C16/1107/39/YM	Dymchwel modurdy presennol a chodi un newydd – Eagle House, Sarn Bach
C16/1345/39/YM	Ffenestri newydd a phorth – Gwêl yr Ynys, Wellington, 2 Lôn Wilis, Mynytho

## 11. CADARNHAU TALIADAU A DERBYNIADAU

### Taliadau

Cadarnhawyd talu cyflog mis Tachwedd y Clerc (Rh/S 002023), ynghyd â'r taliadau a ganlyn:

- a) Cyngor Gwynedd – £439.45 (Rh/S 002022 – Gwagio Biniau Baw Cŵn mis Awst a Medi)
- b) J.A. Pozzi – £1848.00 (Rh/S 002024 – Torri Gwellt Cae Chwarae Aber-soch)
- c) Clorian Cymru – £1244.40 (Rh/S 002025 – Recordydd TCC newydd ar system Talafon a chyflenwi a gosod system newydd ar doiledau Lôn Traeth, Aber-soch)

### Derbyniadau

- a) Arian Mynediad y Toiledau – £26.41 (£5.90, £7.83, £9.41 a £3.27)
- b) Cyngor Gwynedd – £3656.65 (Ad-daliad Torri Llwybrau)

## 12. DYDDIAD AC AMSER Y CYFARFOD NESAF

Nos Fercher, Rhagfyr 14eg, 2016 am saith o'r gloch